

頌古百則

雪竇明覺重顯禪師 著

| | |
|--------------------|----|
| 第一則 聖諦第一義 | 6 |
| 第二則 趙州至道無難 | 6 |
| 第三則 馬祖日面佛月面佛 | 7 |
| 第四則 德山挾複問答 | 7 |
| 第五則 雪峯粟粒 | 8 |
| 第六則 雲門日日好日 | 8 |
| 第七則 慧超問佛 | 8 |
| 第八則 翠巖眉毛 | 9 |
| 第九則 趙州四門 | 9 |
| 第十則 睦州掠虛漢 | 9 |
| 第十一則 黃蘗噉酒糟漢 | 10 |
| 第十二則 洞山麻三斤 | 10 |
| 第十三則 巴陵銀椀裏盛雪 | 10 |
| 第十四則 雲門一代時教 | 11 |
| 第十五則 雲門倒一說 | 11 |
| 第十六則 鏡清啐啄機 | 11 |
| 第十七則 香林坐久成勞 | 12 |
| 第十八則 忠國師無縫塔 | 12 |

| | |
|---------------------|----|
| 第十九則 俱胝只豎一指 | 12 |
| 第二十則 翠微禪板 | 13 |
| 第二十一則 智門蓮花荷葉 | 13 |
| 第二十二則 雪峯鼈鼻蛇 | 13 |
| 第二十三則 保福長慶遊山次 | 14 |
| 第二十四則 鐵磨老犍牛 | 14 |
| 第二十五則 蓮花峯拈拄杖 | 15 |
| 第二十六則 百丈獨坐大雄峯 | 15 |
| 第二十七則 雲門體露金風 | 15 |
| 第二十八則 南泉不說底法 | 16 |
| 第二十九則 大隨隨他去 | 16 |
| 第三十則 趙州大蘿蔔頭 | 17 |
| 第三十一則 麻谷持錫遶床 | 17 |
| 第三十二則 定上座佇立 | 17 |
| 第三十三則 陳操具隻眼 | 18 |
| 第三十四則 仰山不曾遊山 | 18 |
| 第三十五則 文殊前後三三 | 19 |
| 第三十六則 長沙芳草落花 | 19 |
| 第三十七則 槃山三界無法 | 19 |
| 第三十八則 風穴祖師心印 | 20 |
| 第三十九則 雲門花藥欄 | 20 |
| 第四十則 陸亘天地同根 | 21 |

| | | |
|-------|---------------|----|
| 第四十一則 | 趙州大死底 | 21 |
| 第四十二則 | 龐居士好雪片片 | 21 |
| 第四十三則 | 洞山無寒暑 | 22 |
| 第四十四則 | 禾山解打鼓 | 22 |
| 第四十五則 | 趙州七斤布衫 | 23 |
| 第四十六則 | 鏡清雨滴聲 | 23 |
| 第四十七則 | 雲門六不收 | 23 |
| 第四十八則 | 招慶翻却茶銚 | 24 |
| 第四十九則 | 三聖透網金鱗 | 24 |
| 第五十則 | 雲門塵塵三昧 | 24 |
| 第五十一則 | 雪峰是什麼 | 25 |
| 第五十二則 | 趙州渡驢渡馬 | 25 |
| 第五十三則 | 百丈野鴨子 | 26 |
| 第五十四則 | 雲門却展兩手 | 26 |
| 第五十五則 | 道吾一家吊慰 | 26 |
| 第五十六則 | 欽山一鏃破關 | 27 |
| 第五十七則 | 趙州田厰奴 | 28 |
| 第五十八則 | 趙州分踈不下 | 28 |
| 第五十九則 | 趙州何不引盡 | 28 |
| 第六十則 | 雲門拄杖化龍 | 29 |
| 第六十一則 | 風穴家國興盛 | 29 |
| 第六十二則 | 雲門中有一寶 | 29 |

| | |
|--------------------|----|
| 第六十三則 南泉斬却貓兒 | 30 |
| 第六十四則 外道良馬鞭影 | 30 |
| 第六十五則 趙州頭戴草鞋 | 31 |
| 第六十六則 大龍堅固法身 | 31 |
| 第六十七則 雲門古佛露柱 | 31 |
| 第六十八則 巖頭收黃巢劍 | 32 |
| 第六十九則 傅大士講經竟 | 32 |
| 第七十則 仰山汝名什麼 | 32 |
| 第七十一則 南泉畫一圓相 | 33 |
| 第七十二則 瀉山請和尚道 | 33 |
| 第七十三則 五峰和尚併却 | 34 |
| 第七十四則 雲巖和尚有也 | 34 |
| 第七十五則 馬祖四句百非 | 34 |
| 第七十六則 金牛飯桶 | 35 |
| 第七十七則 大光這野狐精 | 35 |
| 第七十八則 鹽官犀牛扇子 | 35 |
| 第七十九則 世尊陞座 | 36 |
| 第八十則 烏白屈棒屈棒 | 36 |
| 第八十一則 丹霞喫飯也未 | 37 |
| 第八十二則 雲門餠餅 | 37 |
| 第八十三則 開士入浴 | 38 |
| 第八十四則 投子一切佛聲 | 38 |

| | |
|-----------------------|----|
| 第八十五則 趙州初生孩子 | 38 |
| 第八十六則 藥山塵中塵 | 39 |
| 第八十七則 維摩不二法門 | 39 |
| 第八十八則 桐峯庵主作虎聲 | 40 |
| 第八十九則 雲門廚庫三門 | 40 |
| 第九十則 雲門藥病相治 | 40 |
| 第九十一則 玄沙三種病人 | 41 |
| 第九十二則 雲巖大悲手眼 | 41 |
| 第九十三則 智門般若體 | 42 |
| 第九十四則 楞嚴不見 | 42 |
| 第九十五則 長慶阿羅漢三毒 | 42 |
| 第九十六則 趙州三轉語 | 43 |
| 第九十七則 《金剛經》罪業消滅 | 43 |
| 第九十八則 天平行脚 | 44 |
| 第九十九則 忠國師十身調御 | 44 |
| 第一百則 巴陵吹毛劍 | 45 |

第一則 聖諦第一義

舉梁武帝問達磨大師：“如何是聖諦第一義？”達磨云：“廓然無聖。”帝云：“對朕者誰？”達磨云：“不識。”帝不契。遂渡江至魏。武帝舉問志公。志公云：“陛下還識此人否？”帝曰：“不識。”志公云：“此是觀音大士，傳佛心印。”帝悔，遂遣使取。志公云：“莫道陛下發使去取，闔國人去，他亦不迴！”

【頌曰】聖諦廓然，何當辨的。對朕者誰，還云不識。因茲暗渡江，豈免生深棘。闔國人追不再來，千古萬古空相憶。休相憶，清風匝地有何極。師顧視左右雲：“這裏還有祖師麼？”白云：“有，喚來與老僧洗腳。”

第二則 趙州至道無難

舉趙州示眾云：“至道無難，唯嫌揀擇。纔有語言，是揀擇、是明白。老僧不在明白裏。是汝還護惜也無？”時有僧問云：“既不在明白裏，護惜箇什麼？”州云：“我亦不知。”僧云：“和尚既不知，為什麼道不在明白裏？”州云：“問事即得，禮拜了退。”

【頌曰】至道無難，言端語端。一有多種，二無兩般。天際日上月下，檻前山深水寒。髑髏識盡喜何立，枯木龍吟消未乾。難！難！

揀擇明白君自看。

第三則 馬祖日面佛月面佛

舉馬大師不安。院主問：“和尚近日，尊位如何？”大師云：“日面佛，月面佛。”

【頌曰】日面佛月面佛，五帝三皇是何物。二十年來曾苦辛，為君幾下蒼龍窟。屈堪述！明眼衲僧莫輕忽。

第四則 德山挾複問答

舉德山到滄山，挾複子於法堂上，從西過東邊，從東過西邊，顧視云：“無！無！”便出。師著語云：“勘破了也！”德山至門首却云：“也不得草草！”便具威儀，載入相見。滄山坐次，德山提起坐具云：“和尚”。滄山擬取拂子，德山便喝，拂袖而出。師著語云：“勘破了也！”德山背却法堂，著草鞋便行。滄山至晚問首座：“適來新到在什麼處？”首座云：“當時背却法堂，著草鞋出去也。”滄山云：“此子已後，向孤峯頂上，盤結草庵，呵佛罵祖去在！”師著語云：“雪上加霜！”

【頌曰】一勘破，二勘破，雪上加霜曾險墮。飛騎將軍入虜庭，載得完全能幾箇。急走過，不放過，孤峯頂上草裏坐。咄！

第五則 雪峯粟粒

舉雪峯示眾云：“盡大地撮來，如粟米粒大，拋向面前。漆桶不會，打鼓普請看。”

【頌曰】牛頭沒，馬頭迴，曹溪鏡裏絕塵埃。打鼓看來君不見，百花春至為誰開。

第六則 雲門日日好日

舉雲門大師垂語云：“十五日已前不問汝，十五日已後道將一句來。”自代云：“日日是好日！”

【頌曰】去卻一，拈得七，上下四維無等匹。徐行踏斷流水聲，縱觀寫出飛禽跡。草茸茸，煙冪冪，空生巖畔花狼藉。彈指堪悲舜若多，莫動著，動著三十棒！

第七則 慧超問佛

舉僧問法眼：“慧超咨和尚，如何是佛？”法眼云：“汝是慧超。”

【頌曰】江國春風吹不起，鷓鴣啼在深花裏。三級浪高魚化龍，癡人猶岸夜塘水。

第八則 翠巖眉毛

舉翠巖夏末示眾云：“一夏已來，為兄弟說話，看翠巖眉毛在麼？”
保福云：“作賊人心虛。”長慶云：“生也。”雲門云：“關！”

【頌曰】翠巖示徒，千古無對。關字相酬，失錢遭罪。潦倒保福，抑揚難得。嘮嘮翠巖，分明是賊。白珪無玷，誰辨真假。長慶相諳，眉毛生也。

第九則 趙州四門

舉僧問趙州：“如何是趙州？”州云：“東門南門西門北門。”

【頌曰】句裏呈機劈面來，爍迦羅眼絕纖埃。東南西北門相對，無限輪鎚擊不開。

第十則 睦州掠虛漢

舉睦州問僧：“近離什麼？”僧便喝。州云：“老僧被汝一喝。”
僧又喝。州云：“三喝、四喝後，作麼生？”僧無語。州便打，云：
“這掠虛漢！”

【頌曰】兩喝與三喝，作者知機變。若謂騎虎頭，二俱成瞎漢。
誰瞎漢，拈來天下與人看。

第十一則 黃蘗嗜酒糟漢

舉黃蘗和尚示眾云：“汝等諸人，盡是嗜酒糟漢。與麼行腳，何處有今日？還知大唐國裏無禪師麼？”時有僧出云：“只如諸方匡徒領眾，又作麼生？”蘗云：“不道無禪，只是無師。”

【頌曰】凜凜孤風不自誇，端居寰海定龍蛇。大中天子曾輕觸，三度親遭弄爪牙。

第十二則 洞山麻三斤

舉僧問洞山：“如何是佛？”山云：“麻三斤。”

【頌曰】金烏急，玉兔速，善應何曾有輕觸。展事投機見洞山，跛鼈盲龜入空谷。花簇簇，錦簇簇，南地竹兮北地木。因思長慶陸大夫，解道合笑不合哭。咦！

第十三則 巴陵銀碗裏盛雪

舉僧問巴陵：“如何是提婆宗？”巴陵云：“銀碗裏盛雪。”

【頌曰】老新開，端的別，解道銀碗裏盛雪。九十六箇應自知，不知却問天邊月。提婆宗，提婆宗，赤幡之下起清風。

第十四則 雲門一代時教

舉僧問雲門：“如何是一代時教？”門云：“對一說。”

【頌曰】對一說，太孤絕，無孔鐵鎚重下楔。閻浮樹下笑呵呵，昨夜驪龍拗角折。別！別！韶陽老人得一橛。

第十五則 雲門倒一說

舉僧問雲門：“不是目前機，亦非目前事時如何？”雲門云：“倒一說。”

【頌曰】倒一說，分一節，同死同生為君決。八萬四千非鳳毛，三十三人入虎穴。別！別！擾擾忿忿水裏月。

第十六則 鏡清啐啄機

舉僧問鏡清：“學人啐，請師啄。”清云：“還得活也無？”僧云：“若不活，遭人恠笑。”清云：“也是草裏漢。”

【頌曰】古佛有家風，對揚遭貶剝。子母不相知，是誰同啐啄。啄覺猶在殼，重遭撲，天下衲僧徒名邈。

第十七則 香林坐久成勞

舉僧問香林：“如何是祖師西來意？”林云：“坐久成勞。”

【頌曰】一箇兩箇千萬箇，脫却籠頭卸角馱。左轉右轉隨後來，紫胡要打劉鐵磨。

第十八則 忠國師無縫塔

舉肅宗帝問忠國師：“百年後所須何物？”國師云：“與老僧作箇無縫塔。”帝曰：“請師塔樣。”國師良久云：“會麼？”帝云：“不會。”國師云：“吾有付法弟子耽源，却諳此事，請詔問之。”國師遷化後，肅宗帝詔耽源，問：“此意如何？”源云：“相之南，潭之北，師云獨掌不浪鳴。中有黃金充一國，山形拄杖子。無影樹下合同船，海晏河清。琉璃殿上無知識。”拈了也。

【頌曰】無縫塔，見還難，澄潭不許蒼龍蟠。層落落，影團團，千古萬古與人看。

第十九則 俱胝只豎一指

舉俱和尚凡有所問，只豎一指。

【頌曰】對揚深愛老俱胝，宇宙空來更有誰。曾向滄溟下浮木，夜濤相共接盲龜。

第二十則 翠微禪板

舉龍牙問翠微：“如何是祖師西來意？”微云：“與我過禪板來。”牙取禪板與翠微，微接得便打。牙云：“打即任打，要且無祖師意。”又問林際：“如何是祖師西來意？”際云：“與我過蒲團來。”牙取蒲團與臨際，際接得便打。牙云：“打即任打，要且無祖師意。”

【頌曰】龍牙山裏龍無眼，死水何曾振古風。禪板蒲團不能用，只應分付與盧公。師拈云：“這老漢，也未得勦絕。”復成頌曰：“盧公付了亦何憑，坐倚休將繼祖燈。堪對暮雲歸未合，遠山無限碧層層。”

第二十一則 智門蓮花荷葉

舉僧問智門：“蓮花未出水時如何？”智門云：“蓮花。”僧云：“出水後如何？”智門云：“荷葉。”

【頌曰】蓮花荷葉報君知，出水何如未出時。江北江南問王老，一狐疑了一狐疑。

第二十二則 雪峯鼈鼻蛇

舉雪峯示眾云：“南山有一條鼈鼻蛇，汝等諸人，切須好看！”長

慶出云：“今日堂中，大有人喪身失命。”

僧舉似玄沙，沙云：“須是稜兄始得，然雖如此，我即不與麼。”

僧云：“和尚作麼生？”沙云：“用南山作麼？”雲門以拄杖攬向雪峯面前，作怕勢。

【頌曰】象骨巖高人不到，到者須是弄蛇手。稜師備師不奈何，喪身失命有多少。韶陽知，重撥草，南北東西無處討。忽然突出拄杖頭，拋對雪峯大張口。大張口兮同閃電，剔起眉毛還不見。如今藏在乳峯前，來者一一看方便。師高聲喝云：“看腳下！”

第二十三則 保福長慶遊山次

舉保福長慶遊山次，福以手指云：“只這裏便是妙峯頂。”慶云：“是即是，可惜許。”師著語云：“今日共這漢遊山，畵什麼？”復云：“百千年後，不道無，只是少。”後舉似鏡清，清云：“若不是孫公，便見髑髏徧野！”

【頌曰】妙峯孤頂草離離，拈得分明付與誰。不是孫公辨端的，髑髏著地幾人知。

第二十四則 鐵磨老特牛

舉劉鐵磨到滄山，山云：“老特牛，汝來也。”磨云：“來日臺山大會齋，和尚還去麼？”山放身卧，磨便出去。

【頌曰】曾騎鐵馬入重城，勅下傳聞六國清。猶握金鞭問歸客，夜深誰共御街行。

第二十五則 蓮花峯拈拄杖

舉蓮花峯庵主拈拄杖示眾云：“古人到這裏，為什麼不肯住？”眾無語。自云：“為他途路不得力。”復云：“畢竟如何？”又自云：“柳栗橫擔不顧人，却入千峯萬峯去。”

【頌曰】眼裏塵沙耳裏土，千峯萬峯不肯住。落花流水太茫茫，別起眉毛何處去。

第二十六則 百丈獨坐大雄峯

舉僧問百丈：“如何是奇特事？”丈云：“獨坐大雄山。”僧禮拜，丈便打。

【頌曰】祖域交馳天馬駒，化門舒卷不同途。電光石火存機變，堪笑人來捋虎須。

第二十七則 雲門體露金風

舉僧問雲門：“樹凋葉落時如何？”門云：“體露金風。”

【頌曰】問既有宗，答亦攸同。三句可辨，一鏃遼空。大野兮涼飈颯颯，長天兮踈雨濛濛。君不見少林久坐未歸客，靜依熊耳一叢叢。

第二十八則 南泉不說底法

舉南泉叅百丈涅槃和尚。丈問：“從上諸聖，還有不為人說底法麼？”泉云：“有。”丈云：“作麼生是不為人說底法？”泉云：“不是心，不是佛，不是物。”丈云：“說了也。”泉云：“某甲只與麼，和尚作麼生？”丈云：“我又不是大善知識，爭知有說不說！”泉云：“某甲不會。”丈云：“我太煞為汝說也。”

【頌曰】祖佛從來不為人，衲僧今古競頭走。明鏡當臺列象殊，一一面南看北斗。斗柄垂，無處討，拈得鼻孔失却口。

第二十九則 大隨隨他去

舉僧問大隨：“劫火洞然，大千俱壞，未審這箇壞不壞？”隨云：“壞。”僧云：“與麼則隨他去也。”隨云：“隨他去。”

【頌曰】劫火光中立問端，衲僧猶滯兩重關。可憐一句隨他語，萬裏區區獨往還。

第三十則 趙州大蘿蔔頭

舉僧問趙州：“承聞和尚親見南泉是否？”州云：“鎮州出大蘿蔔頭。”

【頌曰】鎮州出大蘿蔔，天下衲僧取則。只知自古自今，爭辨鵝白烏黑。賊！賊！衲僧鼻孔曾拈得。

第三十一則 麻谷持錫遶床

舉麻谷持錫到章敬，遶繩床三匝，振錫一下，卓然而立。章敬云：“是！是！”師著語云：“錯！”麻谷又到南泉，遶繩床三匝，振錫一下，卓然而立。泉云：“不是！不是！”師著語云：“錯！”谷當時云：“章敬道是，和尚為什麼道不是？”泉云：“章敬即是，是汝不是。此是風力所轉，終成敗壞。”

【頌曰】此錯彼錯，切忌拈却。四海浪平，百川潮落。古策風高十二門，門門有路空蕭索。非蕭索，作者好求無病藥。

第三十二則 定上座佇立

舉定上座問臨際：“如何是佛法大意？”際下繩床擒住，與一掌，便托開。定佇立。傍僧云：“定上座何不禮拜？”定方禮拜，忽然大悟。

【頌曰】斷際全機繼後蹤，持來何必在從容。巨靈擡手無多子，分破華山千萬重。

第三十三則 陳操具隻眼

舉陳操尚書看資福。福見來，便畫一圓相。陳操云：“弟子恁麼來，早是不著便，更畫圓相！”資福便掩却方丈門。師雲：“陳操只具一隻眼。”

【頌曰】團團珠遶玉珊珊，馬載驢駝上鐵船。分付海山無事客，釣鼈時下一捲竿。師復雲：“天下衲僧跳不出。”

第三十四則 仰山不曾遊山

舉仰山問僧：“近離甚處？”僧云：“廬山。”仰山云：“曾到五老峰麼？”僧云：“不曾到。”仰山云：“闍黎不曾遊山。”雲門云：“此語皆為慈悲之故，有落草之譚。”

【頌曰】出草入草，誰解尋討。白雲重重，紅日杲杲。左顧無暇，右眄已老。君不見，寒山子行太早，十年歸不得，忘卻來時道。

第三十五則 文殊前後三三

舉文殊問無著：“近離甚處？”著云：“南方。”殊云：“南方佛法，如何住持？”著云：“末法比丘，少奉戒律。”殊云：“多少眾？”著云：“或三百，或五百。”著問：“此間如何住持？”殊云：“凡聖同居，龍蛇混雜。”著云：“多少眾？”殊云：“前三三，後三三。”

【頌曰】千峯盤屈色如藍，誰謂文殊是對譚。堪笑清涼多少眾，前三三與後三三。

第三十六則 長沙芳草落花

舉長沙一日遊山，歸至門首。首座問：“和尚什麼處去來？”沙云：“遊山來。”座云：“到什麼處來？”沙云：“始隨芳草去，又逐落花迴。”座云：“大似春意。”沙云：“也勝秋露滴芙蓉。”師著語云：“謝荅話。”

【頌曰】大地絕纖埃，何人眼不開。始隨芳草去，又逐落花迴。羸鶴翹寒木，狂猿嘯古臺，長沙無限意。咄！

第三十七則 槃山三界無法

舉槃山垂語云：“三界無法，何處求心！”

【頌曰】三界無法，何處求心。白雲為蓋，流泉作琴。一曲兩曲

無人會，雨過夜堂秋水深。

第三十八則 風穴祖師心印

舉風穴在郢州衙內上堂云：“祖師心印，狀似鐵牛之機。去即印住，住即印破。只如不去不住，印即是，不印即是。”時有盧陂長老出問：“某甲有鐵牛之機，請師不搭印。”風穴云：“慣釣鯨鯢澄巨浸，却嗟蛙步驟泥沙！”陂佇思，穴喝云：“長老何不進語？！”陂擬議，穴打一拂子，云：“還記得話頭麼？試舉看。”盧陂擬開口，穴又打一拂子。牧主云：“佛法與王法一般。”穴云：“見箇什麼？”牧主云：“當斷不斷，返招其亂。”穴便下座。

【頌曰】擒得盧陂跨鐵牛，三玄戈甲未輕酬。楚王城畔朝宗水，喝下曾令却倒流。

第三十九則 雲門花藥欄

舉僧問雲門：“如何是清淨法身？”門云：“花藥欄。”僧云：“便與麼去時如何？”門云：“金毛師子。”

【頌曰】花藥欄，莫顛預，星在秤兮不在盤。便與麼，太無端，金毛師子大家看。

第四十則 陸亘天地同根

舉陸亘大夫與南泉語話次，夫云：“肇法師道‘天地同根，萬物一體’，也甚奇恠！”南泉指庭前花，召大夫云：“時人見此一株花，如夢相似。”

【頌曰】聞見覺知非一一，山河不在鏡中觀。霜天月落夜將半，誰共澄潭照影寒。

第四十一則 趙州大死底

舉趙州問投子：“大死底人，却活時如何？”投子云：“不許夜行，投明須到。”

【頌曰】活中有眼還同死，藥忌何須鑿作家。古佛尚言曾未到，不知誰解撒塵沙。

第四十二則 龐居士好雪片片

舉龐居士辭藥山。山命十人禪客，相送至門首。士指空中雪云：“好雪片片，不落別處。”時有全禪客云：“落在什麼處？”士打一掌，全云：“居士也不得草草。”士云：“汝恁麼稱禪客，闍老子未放汝在。”全云：“居士作麼生？”士又打一掌，云：“眼見如盲，口說如啞。”師別：“初問處，但握雪團便打！”

【頌曰】雪團打，雪團打，龐老機關沒可把。天上人間不自知，眼裏耳裏絕瀟灑。瀟灑絕，碧眼胡僧難辨別。

第四十三則 洞山無寒暑

舉僧問洞山：“和尚寒暑到來，如何迴避？”山云：“何不向無寒暑處。”僧云：“如何是無寒暑處？”山云：“寒時寒殺闍黎，熱時熱殺闍黎。”

【頌曰】垂手還同萬仞崖，正偏何必在安排。琉璃古殿照明月，忍俊韓獹空上階。

第四十四則 禾山解打鼓

舉禾山垂語云：“習學謂之聞，絕學謂之隣。過此二者，是為真過。”僧出問：“如何是真過？”山云：“解打鼓。”又問：“如何是真諦？”山云：“解打鼓。”又問：“‘即心即佛’即不問，如何是‘非心非佛’？”山云：“解打鼓。”又問：“向上人來時，如何接？”山云：“解打鼓。”

【頌曰】一拽石，二般土，發機須是千鈞弩。象骨老師曾鞞毬，爭似禾山解打鼓。報君知，莫莽鹵，甜者甜兮苦者苦。

第四十五則 趙州七斤布衫

舉僧問趙州：“萬法歸一，一歸何處？”州云：“我在青州，作一領布衫，重七斤。”

【頌曰】編辟曾挨老古錘，七斤衫重幾人知。如今拋擲西湖裏，下載清風付與誰。

第四十六則 鏡清雨滴聲

舉鏡清問僧：“門外什麼聲？”僧云：“雨滴聲。”清云：“眾生顛倒迷己逐物。”僧云：“和尚作麼生？”清云：“泊不迷己。”僧云：“泊不迷己，意旨如何？”清云：“出身猶可易，脫體道應難。”

【頌曰】虛堂雨滴聲，作者難酬對。若謂曾入流，依前還不會。會不會，南山北山轉霧霏。

第四十七則 雲門六不收

舉僧問雲門：“如何是法身？”門云：“六不收。”

【頌曰】一二三四五六，碧眼胡僧數不足。少林謾道付神光，卷衣又說歸天竺。天竺茫茫無處尋，夜來却對乳峯宿。

第四十八則 招慶翻却茶銚

舉王太傅入，招慶煎茶。時朗上座與明招把銚。朗翻却茶銚。太傅見，問上座：“茶爐下是什麼？”朗云：“捧爐神。”太傅云：“既是捧爐神，為什麼翻却茶銚？”朗云：“仕官千日失在一朝。”太傅拂袖便去。明招云：“朗上座喫却招慶飯了，却江外打野榿。”朗云：“上座作麼生？”招云：“非人得其便。”師云：“當時但踏倒茶爐。”

【頌曰】來問若成風，應機非善巧。可悲獨眼龍，曾未呈牙爪。
牙爪開，生雲雷，逆水之波經幾迴。

第四十九則 三聖透網金鱗

舉三聖問雪峯：“透網金鱗，未審以何為食？”峯云：“待汝出網來，向汝道。”聖云：“一千五百人善知識，話頭也不識！”峯云：“老僧住持事煩。”

【頌曰】透網金鱗，休云滯水。搖乾蕩坤，振鬣擺尾。千尺鯨噴洪浪飛，一聲雷振清飆起。清飆起，天上人間知幾幾。

第五十則 雲門塵塵三昧

舉僧問雲門：“如何是塵塵三昧？”門云：“鉢裏飯桶裏水。”

【頌曰】鉢裏飯桶裏水，多口阿師難下齧。北斗南星位不殊，白

浪滔天平地起。擬不擬，止不止，箇箇無裨長者子。

第五十一則 雪峯是什麼

舉雪峯住庵時，有兩僧來禮拜。峯見來，以手托庵門，放身出，云：“是什麼？”僧亦云：“是什麼？”峯低頭歸庵。僧後到巖頭，頭問：“什麼處來？”僧云：“嶺南來。”頭云：“曾到雪峯麼？”僧云：“曾到。”頭云：“有何言句？”僧舉前話，頭云：“他道什麼？”僧云：“他無語低頭歸庵。”頭云：“噫！我當初悔不向他道末後句。若向伊道，天下人不奈雪老何！”僧至夏末，載舉前話請益。頭曰：“何不早問？”僧云：“未敢容易。”頭云：“雪峯雖與我同條生，不與我同條死。要識末後句，只這是。”

【頌曰】末後句，為君說，明暗雙雙底時節。同條生也共相知，不同條死還殊絕。還殊絕，黃頭碧眼須甄別。南北東西歸去來，夜深同看千巖雪。

第五十二則 趙州渡驢渡馬

舉僧問趙州：“久響趙州石橋，到來只見略約。”州云：“汝只見略約，不見石橋。”僧云：“如何是石橋？”州云：“渡驢渡馬。”

【頌曰】孤危不立道方高，入海還須釣巨鼈。堪笑同時灌溪老，解云劈箭亦徒勞。

第五十三則 百丈野鴨子

舉馬大師與百丈行次，見野鴨子飛過，大師云：“是什麼？”丈云：“野鴨子。”大師云：“什麼處去也？”丈云：“飛過去也。”大師遂扭百丈鼻頭，丈作忍痛聲。大師云：“何曾飛去！”

【頌曰】野鴨子，知何許，馬祖見來相共語。話盡山雲海月情，依前不會還飛去。欲飛去，却把住。道！道！

第五十四則 雲門却展兩手

舉雲門問僧：“近離甚處？”僧云：“西禪。”門云：“西禪近日有何言句？”僧展兩手，門打一掌。僧云：“某甲話在。”門却展兩手。僧無語，門便打。

【頌曰】虎頭虎尾一時收，凜凜威風四百州，却問不知何太險。師云：“放過一著。”

第五十五則 道吾一家吊慰

舉道吾與漸源，至一家吊慰。源拍棺木云：“生耶死耶？”吾云：“生也不道，死也不道。”源云：“為什麼不道？”吾云：“不道！不

道！”迴至中路，源云：“和尚快與某甲道。若不道，打和尚去！”吾云：“打即任打，道即不道。”源便打。後道吾遷化，源至石霜舉似前話，霜云：“生也不道，死也不道。”源云：“為什麼不道？”霜云：“不道！不道！”源於言下有省。源一日將鋤子，於法堂上，從東邊過西邊 從西邊過東邊。霜云：“作什麼？”源云：“覓先師靈骨。”霜云：“洪波浩渺，白浪滔天，覓什麼先師靈骨！？”師著語云：“蒼天蒼天。”源云：“正好著力。”霜云：“一物也無，著什麼力！”源持鋤上肩便行。太原孚云：“先師靈骨猶在。”

【頌曰】兔馬有角，牛羊無角。絕毫絕釐，如山如嶽。黃金靈骨今猶在，白浪滔天何處著。無處著，隻履西歸曾失却。

第五十六則 欽山一鏃破關

舉良禪客問欽山：“一鏃破三關時如何？”云：“放出關中主看。”良云：“與麼則知過必改。”山云：“更待何時？”良云：“好箭放不著所在。”便出。山云：“且來闍梨。”良迴首，山把住，云：“一鏃破三關即且致，試與欽山發箭看。”良擬議，山打七棒，云：“且聽這漢疑三十年！”

【頌曰】與君放出關中主，放箭之徒莫莽鹵。取箇眼兮耳必聾，捨箇耳兮目雙瞽。可憐一鏃破三關，的的分明箭後路。君不見，玄沙有言兮，大丈夫先天為心祖。

第五十七則 趙州田厰奴

舉僧問趙州：“至道無難，唯嫌揀擇。如何是不揀擇？”州云：“天上天下，唯我獨尊。”僧云：“此猶是揀擇。”州云：“田厰奴，什麼處是揀擇？！”僧無語。

【頌曰】似海之深，如山之固。蚊蟲弄空裏猛風，螻蟻撼於鐵柱。揀兮擇兮，當軒布鼓。

第五十八則 趙州分踈不下

舉僧問趙州：“‘至道無難，唯嫌揀擇’，是時人窠窟否？”州云：“曾有人問我，直得五年分踈不下。”

【頌曰】象王嘖呻，師子哮吼。無味之譚，塞斷人口。南北東西，鳥飛兔走。

第五十九則 趙州何不引盡

舉僧問趙州：“至道無難，唯嫌揀擇。纔有語言，是揀擇。和尚如何為人？”州云：“何不引盡這語！”僧云：“某甲只念到這裏。”州云：“只這‘至道無難，唯嫌揀擇’！”

【頌曰】水灑不著，風吹不入。虎步龍行，鬼號神泣。頭長三尺

知是誰，相對無言獨足立。

第六十則 雲門拄杖化龍

舉雲門以拄杖示眾云：“拄杖子化為龍，吞却乾坤了也。山河大地甚處得來？”

【頌曰】拄杖子吞乾坤，徒說桃花浪奔。燒尾者不在拏雲攫霧，曝腮者何必喪膽忘魂。拈了也，聞不聞，直須灑灑落落，休更紛紛紜紜。七十二棒且輕恕，一百五十難放君。師驀拈拄杖下座，大眾一時走散。

第六十一則 風穴家國興盛

舉風穴垂語云：“若立一塵，家國興盛。不立一塵，家國喪亡。”師拈拄杖云：“還有同生同死底衲僧麼？”

【頌曰】野老從教不展眉，且畱家國立雄基。謀臣猛將今何在，萬里風清祇自知。

第六十二則 雲門中有一寶

舉雲門垂語云：“乾坤之內，宇宙之間，中有一寶，秘在形山。

拈燈籠向佛殿裏，將三門來燈籠上。”

【頌曰】看！看！古岸何人把釣竿。雲冉冉，水漫漫，明月蘆花君自看。

第六十三則 南泉斬却貓兒

舉南泉一日東西堂爭貓兒，南泉見遂提起，云：“道得即不斬。”眾無對。泉斬却貓兒為兩段。

【頌曰】兩堂俱是杜禪和，撥動煙塵不奈何。賴得南泉能舉令，一刀兩段任偏頗。

第六十四則 外道良馬鞭影

舉外道問佛：“不問有言，不問無言。”世尊良久，外道讚歎云：“世尊大慈大悲，開我迷雲，令我得入。”外道去後，阿難問佛云：“外道有何所證，而言得入。”佛云：“如世良馬，見鞭影而行。”

【頌曰】機輪曾未轉，轉必兩頭走。明鏡忽臨臺，當下分妍醜。妍醜分兮迷雲開，慈門何處生塵埃。因思良馬窺鞭影，千里追風喚得迴。喚得迴，鳴指三下。

第六十五則 趙州頭戴草鞋

舉南泉復舉前話問趙州，州便脫草鞋，於頭上戴出。泉云：“子若在，恰救得貓兒。”

【頌曰】公案圓來問趙州，長安城裏任閑遊。草鞋頭戴無人會，歸到家山便即休。

第六十六則 大龍堅固法身

舉僧問大龍：“色身敗壞，如何是堅固法身？”龍云：“山花開似錦，澗水湛如藍。”

【頌曰】問曾不知，答還不會。月冷風高，古巖寒檜。堪笑路逢達道人，不將語默對。手把白玉鞭，驪珠盡擊碎。不擊碎，增瑕類。國有憲章，三千條罪。

第六十七則 雲門古佛露柱

舉雲門示眾云：“古佛與露柱相交，是第幾機？”自代云：“南山起雲，北山下雨。”

【頌曰】南山雲，北山雨，四七二三相覩。新羅國裏曾上堂，大唐國裏未打鼓。苦中樂，樂中苦，誰道黃金如糞土。

第六十八則 巖頭收黃巢劍

舉巖頭問僧：“什麼處來？”僧云：“西京來。”頭云：“黃巢過後，還收得劍麼？”僧云：“收得。”巖頭引頸近前云：“因。”僧云：“師頭落也。”巖頭呵呵大笑。僧後到雪峯，峯問：“什麼處來？”僧云：“巖頭來。”峯云：“有何言句？”僧舉前話，雪峯打三十棒趨出。

【頌曰】黃巢過後曾收劍，大笑還應作者知。三十山藤且輕恕，得便宜是落便宜。

第六十九則 傅大士講經竟

舉梁武帝請傅大士講經。大士便於座上，揮案一下，便下座。武帝愕然。志公問：“陛下還會麼？”帝云：“不會。”公云：“大士講經竟。”

【頌曰】不向雙林寄此身，卻於梁土惹埃塵。當時不得志公老，也是恹恹去國人。

第七十則 仰山汝名什麼

舉仰山問三聖：“汝名什麼？”聖云：“慧寂。”山云：“慧寂是我。”聖云：“我名慧然。”仰山呵呵大笑。

【頌曰】雙收雙放若為宗，騎虎由來要絕功。笑罷不知何處去，

只應千古動悲風。

第七十一則 南泉畫一圓相

舉南泉、歸宗、麻谷，同去禮拜忠國師。至路，南泉於地上畫一圓相，云：“道得即去。”歸宗於圓相中坐，麻谷便作女人拜。泉云：“溜麼則不去也。”宗云：“是什麼心行！”

【頌曰】由基箭射猿，遶樹何太直。千箇與萬箇，是誰曾中的。相喚相呼歸去來，曹溪路上休登陟。復云：“曹溪路坦平，為什麼休登陟？”

第七十二則 滄山請和尚道

舉滄山、五峯、雲巖，同侍立百丈。百丈問滄山：“併却咽喉唇吻，作麼生道？”滄山云：“却請和尚道。”百丈云：“我不辭向汝道，恐已後喪我兒孫。”

【頌曰】却請和尚道，虎頭生角出荒草。十洲春盡花凋殘，珊瑚樹林日杲杲。

第七十三則 五峰和尚併却

舉百丈復問五峯：“併却咽喉唇吻，作麼生道？”五峯云：“和尚也須併却。”丈云：“無人處斫額望汝。”

【頌曰】和尚也併却，龍蛇陣上看謀略。令人長憶李將軍，萬里天邊飛一鶚。

第七十四則 雲巖和尚有也

舉百丈又問雲巖：“併却咽喉唇吻，作麼生道？”雲巖云：“和尚有也未？”丈云：“喪我兒孫。”

【頌曰】和尚有也未，金毛師子不踞地。兩兩三三舊路行，大雄山上空彈指。

第七十五則 馬祖四句百非

舉僧問馬大師：“離四句絕百非，請師直指某甲西來意？”馬師云：“我今日勞倦，不能為汝說，問取智藏去。”僧問智藏，藏云：“何不問和尚？”僧云：“和尚教來問。”智藏云：“我今日頭痛，不能為汝說，問取海兄去。”僧問海，海云：“我到這裏却不會。”僧舉似馬大師，馬師云：“藏頭白，海頭黑。”

【頌曰】藏頭白，海頭黑，明眼衲僧會不得。馬駒踏殺天下人，

臨際者是白拈賊。離四句，絕百非，天上人間唯我知。

第七十六則 金牛飯桶

舉金牛和尚每至齋時，自將飯於僧堂前作舞，呵呵大笑云：“菩薩子喫飯來。”師云：“雖然如此，金牛不是好心。”僧問長慶：“古人道‘菩薩子喫飯來’，意旨如何？”長慶云：“大似因齋慶讚。”

【頌曰】白雲影裏笑呵呵，兩手持來付與他。若是金毛獅子子，三千里外見譚訛。

第七十七則 大光這野狐精

舉僧問大光：“長慶道‘因齋慶讚’，意旨如何？”大光作舞，僧禮拜。光云：“見箇什麼便禮拜？”僧作舞，光云：“這野狐精！”

【頌曰】前箭猶輕後箭深，誰雲黃葉是黃金。曹溪波浪如相似，無限平人被陸沉。

第七十八則 鹽官犀牛扇子

舉鹽官一日喚侍者：“與我將犀牛扇子來。”侍者云：“扇子破也。”官云：“扇子既破，還我犀牛兒來。”侍者無對。投子云：“不辭將出，恐頭角不全。”師拈云：“我要不全底頭角。”石霜云：“若還和尚，即

無也。”師拈云：“犀牛兒猶在。”資福畫一圓相，於中書一牛字。師拈云：“適來為什麼不將出！”保福云：“和尚年尊，別請人好。”師拈云：“可惜勞而無功。”

【頌曰】犀牛扇子用多時，問著元來忽不知。無限清風與頭角，盡同雲雨去難追。師復云：“若要清風再復、頭角重生，請禪客各下一轉語。問云：‘扇子既破，還我犀牛兒來’。”時有僧出云：“大眾參堂去。”師喝云：“拋鉤釣鯤鯨，釣得箇蝦蟆！”便下座。

第七十九則 世尊陞座

舉世尊一日陞座，文殊白槌云：“諦觀法王法，法王法如是。”世尊便下座。

【頌曰】列聖叢中作者知，法王法令不如斯。會中若有仙陀客，何必文殊下一槌。

第八十則 烏白屈棒屈棒

舉僧從定州和尚會裏到烏白。烏白問：“定州法道何似這裏？”僧云：“不別。”白云：“若不別，更轉彼中去。”便打。僧云：“棒頭有眼，不得草草打人！”白云：“今日打著一箇也。”又打三下。僧便出去。白云：“屈棒元來有人喫在！”僧轉云：“爭奈杓柄，在和尚手裏。”白云：“汝若要，山僧迴與汝。”僧近前，奪白手中棒，打白三下。白云：“屈棒！屈棒！”僧云：“有人喫在。”白云：“草草打著箇

漢。”僧便禮拜。白云：“却與麼去也。”僧大笑而出。白云：“消得溜麼，消得溜麼。”

【頌曰】呼即易，遣即難，互換機鋒子細看。劫石固來猶可壞，滄溟深處立須乾。烏臼老，烏臼老，幾何般，與他杓柄太無端。

第八十一則 丹霞喫飯也未

舉丹霞問僧：“甚處來？”僧云：“山下來。”霞云：“喫飯也未？”僧云：“喫飯了也。”霞云：“將飯與汝喫底人，還具眼麼？”僧無語。長慶問保福：“將飯與人喫，報恩有分，為什麼不具眼？”福云：“施者、受者，二俱瞎漢。”慶雲：“盡其機來，還成瞎否？”福云：“道我瞎得麼？”

【頌曰】盡機不成瞎，按牛頭喫草。四七二三諸祖師，寶器持來成過咎。過咎深，無處尋，天上人間同陸沉。

第八十二則 雲門餠餅

舉僧問雲門：“如何是超佛越祖之譚？”門云：“餠餅。”

【頌曰】超譚禪客問偏多，縫罽披離見也麼。餠餅（祝+土）來猶不住，至今天下有謠訛。

第八十三則 開士入浴

舉古有十六開士，於浴僧時，隨例入室，忽悟水因，諸禪德，作麼生會他道妙觸宣明？成佛子住也。須七穿八穴始得。

【頌曰】了事衲僧消一箇，長連床上展腳臥。夢中曾說悟圓通，香水洗來驀面唾。

第八十四則 投子一切佛聲

舉僧問投子：“一切聲是佛聲是否？”投子云：“是。”僧云：“和尚莫尿沸捩鳴聲。”子便打。又問：“麤言及細語，皆歸第一義是否？”子云：“是。”僧云：“喚和尚作一頭驢得麼？”子便打。

【頌曰】投子，投子，機輪無阻。放一得二，同彼同此。可憐無限弄潮人，畢竟還落潮中死。忽然活，百川倒流鬧。

第八十五則 趙州初生孩子

舉僧問趙州：“和尚初生孩子，還具六識也無？”州云：“急水上打毬子。”僧復問投子：“‘急水上打毬子’，意旨如何？”子云：“念念不停流。”

【頌曰】六識無功伸一問，作家曾共辨來端。茫茫急水打毬子，落處不停誰解看。

第八十六則 藥山塵中塵

舉僧問藥山：“平田淺草，塵鹿成羣，如何射得塵中塵？”山云：“看箭！”僧放身便倒。山云侍者：“拖出。”僧便走。山云：“弄泥團漢，有什麼限！”師拈云：“三步雖活，五步須死。”

【頌曰】塵中塵，君看取。下一箭，走三步。五步若活，成羣趨虎，正眼從來付獵人。師高聲云：“看箭！”

第八十七則 維摩不二法門

舉維摩詰問文殊師利：“何等是菩薩入不二法門？”文殊師利曰：“如我意者，於一切法，無言無說，無示無識，離諸問答，是為入不二法門。”於是文殊師利問維摩詰：“我等各自說已，仁者當說，何等是菩薩入不二法門？”師云：“維摩道什麼？”復云：“勘破了也。”

【頌曰】咄！這維摩老，悲生空懊惱。臥疾毗耶離，全身太枯槁。七佛祖師來，一室且頻掃。請問不二門，當時便靠倒。不靠倒，金毛師子無處討。

第八十八則 桐峯庵主作虎聲

舉僧到桐峯庵主處便問：“這裏忽逢大蟲，又作麼生？”庵主便作虎聲，僧便作怕勢。庵主呵呵大笑。僧云：“這老賊！”庵主云：“爭奈老僧何？”僧休去。雪竇云：“是即是，兩箇惡賊，只解掩耳偷鈴。”

【頌曰】見之不取，思之千里。好箇班班，爪牙未備。君不見，大雄山下忽相逢，落落聲光皆振地。大丈夫見也無，收虎尾兮捋虎鬚。

第八十九則 雲門廚庫三門

舉雲門垂語云：“人人盡有光明在，看時不見暗昏昏。作麼生是諸人光明？”自代云：“厨庫三門。”又云：“好事不如無。”

【頌曰】自照列孤明，為君通一線。花謝樹無影，看時誰不見。見不見，倒騎牛兮入佛殿。

第九十則 雲門藥病相治

舉雲門示眾云：“藥病相治，盡大地是藥，那箇是自己？”

【頌曰】盡大地是藥，古今何太錯。閉門不造車，通途自寥廓。錯！錯！鼻孔遼天亦穿却。

第九十一則 玄沙三種病人

舉玄沙示眾云：“諸方老宿，盡道接物利生，忽遇三種病人來，作麼生接？患盲者，拈鎚豎拂，他又不見。患聾者，語言三昧，他又不聞。患啞者，教伊說，又說不得。且作麼生接？若接此人不得，佛法無靈驗。”僧請益雲門，門云：“汝禮拜著。”僧禮拜起，門以拄杖便拄，僧退後。門云：“汝不是患盲。”復喚：“近前來。”僧近前，門云：“汝不是患聾。”門乃云：“還會麼？”僧云：“不會。”門云：“汝不是患啞。”其僧於此有省。

【頌曰】盲聾音啞，杳絕機宜。天上天下，堪笑堪悲。離朱不辨正色，師曠豈識玄絲。爭如獨坐虛窓下，葉落花開自有時。復云：“還會也無，無孔鐵鎚。”

第九十二則 雲巖大悲手眼

舉雲巖問道吾：“大悲菩薩用許多手眼作什麼？”吾云：“如人夜半，背手摸枕头。”巖云：“我會也。”吾云：“汝作麼生會？”巖云：“徧身是手眼。”吾云：“道即大殺道，只道得八成。”巖云：“師兄作麼生？”吾云：“通身是手眼。”

【頌曰】徧身是，通身是，拈來猶較十萬里。展翅崩騰六合雲，搏風鼓蕩四溟水。是何埃壘兮忽生，那箇毫釐兮未止。君不見，網珠垂範影重重，棒頭手眼從何起。喝！

第九十三則 智門般若體

舉僧問智門：“如何是般若體？”門云：“蚌含明月。”僧云：“如何是般若用？”門云：“兔子懷胎。”

【頌曰】一片虛凝絕謂情，天人從此見空生。蚌含玄兔深深意，曾與禪家作戰爭。

第九十四則 楞嚴不見

舉《楞嚴經》云：“吾不見時，何不見吾不見之處？若見不見，自然非彼不見之相。若不見吾不見之地，自然非物，云何非汝？”

【頌曰】全象全牛翳不殊，從來作者共名模。如今要見黃頭老，剎剎塵塵在半途。

第九十五則 長慶阿羅漢三毒

舉長慶有時云：“寧說阿羅漢有三毒，不說如來有二種語。不道如來無語，只是無二種語。”保福云：“作麼生是如來語？”慶云：“聾

人爭得聞！”保福云：“情知汝向第二頭道。”長慶云：“作麼生是如來語？”保福云：“喫茶去！”

【頌曰】頭兮第一第二，臥龍不鑿止水。無處有月波澄，有處無風浪起。稜禪客，稜禪客，三月禹門遭點額。

第九十六則 趙州三轉語

舉趙州示眾三轉語。

【頌曰】泥佛不度水，神光照天地。立雪如未休，何人不雕偽。金佛不度爐，人來訪紫胡。牌中數箇字，清風何處無。木佛不渡火，常思破竈墮。杖子忽擊著，方知辜負我。

第九十七則 《金剛經》罪業消滅

舉《金剛經》云：“若為人輕賤，是人先世罪業，應墮惡道，以今世人輕賤故，先世罪業，則為消滅。”

【頌曰】明珠在掌，有功者賞。胡漢不來，全無伎倆。伎倆既無，波旬失途。瞿曇、瞿曇，識我也無。復云：“勘破了也。”

第九十八則 天平行脚

舉天平依和尚行脚時參西院，常云：“莫道會佛法，覓箇舉話人也無！”一日西院遙見，召云：“從依。”平舉頭，西院云：“錯！”平行三兩步，西院又云：“錯！”平近前，西院云：“適來這兩錯，是西院錯？是上座錯？”平云：“從依錯。”西院云：“錯！”平休去。西院云：“且在這裏過夏，待共上座商量這兩‘錯’。”平當時便行。後住，謂眾云：“我當初行脚時，被風吹到思明長老處，連下兩‘錯’，更留我過夏，待共我商量。我不道恁麼時錯，發足向南方去時，早知道錯了也。”

【頌曰】禪家流，愛輕薄，滿肚叅來用不著。堪悲堪笑天平老，却謂當初悔行脚。“錯”！“錯”！西院清風頓銷鑠。復云：“忽有箇衲僧出云‘錯’，雪竇錯何似天平錯？”

第九十九則 忠國師十身調御

舉肅宗帝問忠國師：“如何是十身謂御？”師云：“檀越踏毗盧頂上行。”帝云：“寡人不會。”師云：“莫認自己清淨法身。”

【頌曰】一國之師亦強名，南陽獨許振嘉聲。大唐扶得真天子，曾踏毗盧頂上行。鐵鎚擊碎黃金骨，天地之間更何物。三千剎海夜澄澄，不知誰入蒼龍窟。

第一百則 巴陵吹毛劍

舉僧問巴陵：“如何是吹毛劍？”陵云：“珊瑚枝枝撐著月。”

【頌曰】要平不平，大巧若拙。或指或掌，倚天照雪。大冶兮磨
礱不下，良工兮拂拭未歇。別！別！珊瑚枝枝撐著月。